

Kitar semula perlu diberi keutamaan

DALAM usaha menuju negara maju, Malaysia perlu menitikberatkan aspek pengurusan alam sekitar.

Langkah tersebut bagi memastikan wujudnya alam sekitar yang bersih, selamat dan produktif bagi mencapai pembangunan lestari.

Dalam mewujudkan pembangunan lestari, salah satu aspek alam sekitar yang perlu diberi perhatian adalah pengurusan sisa pepejal.



MOHD. Yusoff

Begitupun, tapak-tapak pelupusan sampah yang terdapat di negara ini semakin padat dan dijangka tidak dapat menampung jumlah sisa pepejal yang semakin meningkat setiap tahun.

Pensyarah Jabatan Alam Sekitar, Fakulti Pengajian

Alam Sekitar, Universiti Putra Malaysia, Dr. Mohd. Yusoff Ishak berkata, fenomena tersebut berlaku disebabkan keengganan masyarakat

mengitar semula sampah mereka.

Katanya, keengganan tersebut didorong oleh sikap dan kesedaran masyarakat terhadap pentingnya mengitar semula sisa pepejal kepada alam sekitar.

“Barang berasaskan plastik, kertas dan kaca boleh dikitar semula. Malah, tong-tong khas turut diletak di kawasan perumahan bagi memudahkan masyarakat mengitar semula sisa pepejal.

“Namun sehingga kini, ia masih gagal dipraktikkan oleh masyarakat

kita. Ini berkait rapat dengan sikap kita sendiri,” katanya ketika dihubungi *Kosmo!* baru-baru ini.

Menurut Mohd. Yusoff, pihak berkuasa perlu lebih tegas dengan mengenakan hukuman kepada individu yang gagal mengasingkan sisa pepejal.

Jelasnya, mengikut Akta Pengurusan Sisa Pepejal dan Pembersihan Awam 2007 (Akta 672), individu yang gagal mengikut peraturan tersebut akan dikompaun maksimum sehingga RM1,000.